

115 年全國語文競賽臺灣原住民族語言朗讀文章 【德鹿谷賽德克語（原稱：德路固語）】 國中學生組 編號 1 號

Hrpesas slaqi

Laqi ksun smkuxul hmrapas, saw bi hrapas ka sdakil dha. Kndadax rabu siida, rmiyaw ka dowriq do asi ka thiyun hmrapas, uxay uri o asi ka bqanun qyqaya hrpasun na.

Seuxal balay han o ana nanaq saw “ hrpasan ”, uxay kiya o “ qyqaya hrpasun ” ida nkiya kana, ini sliq pila. Uxay ka sayang da, asi ka pila kana da, asi ka marig kika niqan ka hrpasun laqi. Kiya ni sexual ga, ida nkiya ka saan hmrapas lqlaqi. Saw ka elug dxgal nganguc sapah, krigun cikuh bling do tduwa hrpasan mquru tasaw da. Ana laqi snaw ana laqi qrijil ida smkuxul bi hmrapas mquru tasaw kana. Hrpasun nii ga, kata tasaw mquru neima ka knama kmrmux bling dxgal, kika hiya ka mangal hangan. Kleelug o nasi smtrung pais do asi ka pspung ima dha ka plealay tsbuc hyaan, kiya ka tduwa pdhuq saun na bling dxgal.

Hrpasun nii o ga tmgsa mnan, kngkingal elug ssaan o qulung bi muda mqriqu kana. Qrquan nii ga niqan ka paru na, niqan ka ciway na uri, asi ka sunan nanaq ka lmnglung “pshuya muda” kika malu. Yasa bqanan mdrumuc ni embiyax nanaq seejiq ka malu uda hici. Duri ni elug dxgal nganguc sapah o tduwa sbtagan gomu uri, seuxal o ida dha klaun balay hmrapas,

ssliun dha ka kngkingal gomu. Gomu nii ga ltudun dha ni maa bbaraw wasil da, ngalan sbowtaw hmrapas laqlaqi ka wasil gomu nii. Tai! Ini sliq ana cikuh pila ni tduwa hmrapas, ida saw nii hmrapas ka laqi seuxal wah!

Ana nanaq saw nii leexan balay ka qyqaya shrapas o, ida mqaras bi ka kndusan. Ana nanaq saw nii leexan balay ka qyqaya shrapas o, musa meuyas sapah pyasan breenux do, pspung snbtagan dha knbowqax ni kndhyaqan o, ida dhiya ka mangal hangan wah! Qrasun balay qmita ka saw nii.

Mnrngaw ka rudan alang “pxal, slaqi ku siida, wada ku suqi hmrapas hrpasun dni, shngian kana ka ga hmapuy idaw uyung sapah, maku sknxan kana ka knux sqrung idaw, ungac brahan da! ” msa. Kari rudan nii o tmgsa mnan, hmrapas o iya qsuqi ni maku lxanan ka ga ddaun sayang da.

Hrpesas ksun o kuxul bi kana lqlaq, ida niqan nanaq ririh na ka hmrapas. Asi ka tunux ka lmnglung uuda, kiya ka pdhuq ka stangan. Hmrapas o ida tduwa skbiyax hiyi, sklukun hiyi uri. Hici do mangal malu hangal, hici do dhqan ka stangan ruwan qsahur seejiq uri da.

孩提時代的遊戲

以前的孩子是在大自然下玩耍，如家門前的泥土馬路，挖個小洞玩彈珠，誰的彈珠進洞誰就贏。若遇到敵人就要比誰先撞擊到對方，他就可以邁向目的地。以前的孩子將橡皮筋連接成一條線，拿來當跳高繩子玩，到平地學校讀書，參加跳高、跳遠比賽時，都名列前茅！

長輩叮嚀我們，玩耍適可而止，玩耍有它的附加價值，當然也要多動動腦思考，才能心想事成；玩耍可以讓身體強壯，輕盈快活，終究獲得許多的讚美，進而達成預期效果。